

दिनांक 11.06.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- केन्द्र री नुवी मंत्रिपरिषद मांय शामिल केई मंत्री आज कामकाज संभाळ्यो।
- मुख्यमंत्री भजनलाल शर्मा प्रदेश मांय बिजली तंत्र री मजबूती सारु न्यारा-न्यारा करार टेमसर पूरा करण बाबत् कह्यो।
- प्रदेश मांय कठे-कठे तेज गर्मी तो कठे-कठे आंधी बारिश- मौसम विभाग कोटा, उदयपुर, जोधपुर अर बीकानेर संभाग मांय कठे-कठे बिरखा रा आसार जताया।

अर

- सरिस्का अभ्यारण्य मांय बाघ रा 3 नुवा शावक निजर आया-उद्यान मांय बाघां री तादाद 43 व्ही।

000

केन्द्रीय मंत्री परिषद मांय शामिल केई मंत्री आज कामकाज संभाळ्यो। गृह अर सहकारिता मंत्री अमित शाह, कृषि अर किसान कल्याण मंत्री शिवराज सिंह चौहान, रेल अर सूचना अर प्रसारण मंत्री अश्विनी वैष्णव, पर्यावरण मंत्री भूपेन्द्र यादव, कपडा मंत्री गिरिराज सिंह, संसदीय कार्य अर अल्पसंख्यक मामलात मंत्री किरन रिजिजू, विदेश मंत्री डॉ. एस जयशंकर अर कानून मंत्री अर्जुनराम मेघवाल आज आप-आप रा मंत्रालय रो कामकाज संभाळ लीनो। केन्द्रीय मंत्री मनोहर लाल, जितेन्द्र सिंह, जयंत चौधरी, संजय सेठ, ज्योतिरादित्य सिंधिया, जगत प्रकाश नड्डा, हरदीप सिंह पुरी, जीतन राम मांझी, अन्नपूर्णा देवी, डॉ. एल. मुरुगन, चिराग पासवान अर सुरेश गोपी ई कामकाज संभाळ्यो। केन्द्रीय संस्कृति अर पर्यटन मंत्री गजेंद्र सिंह शेखावत आज संस्कृति अर पर्यटन मंत्रालय रो कामकाज संभाळ लीनो। ई पाछे खबरनवीसां सागे बातचीत करता थकां शेखावत कह्यो के विकसित भारत बणावण मांय संस्कृति अर पर्यटन रो खास काम व्हेला। वे कह्यो के आवता दिनां संस्कृति, कला अर पर्यटन रा हलका मांय नुवा काम कर्या जावेला। शेखावत कह्यो के जनता ने विकसित भारत बणावण रो पूरो भरोसो है।

00000

मुख्यमंत्री भजनलाल शर्मा प्रदेश मांय बिजली तंत्र ने मजबूत बणावण सारु विद्युत निगमां अर केन्द्रीय उपक्रमां बीचे व्ह्या करार रे मुजब टेमसर काम करण सारु कह्यो है। वे आज मुख्यमंत्री रा दफतर मांय राख्यी ज्यी ऊर्जा विभाग रा आला अहलकारां सागे राख्यी ज्यी समीक्षा बैठक मांय बोल रह्या हा। मुख्यमंत्री आवता सिंयाळू सीज़न मांय किसानां ने पाणत सारु लगातार बिजली मुहैया करावण सारु तैयारियां करण बाबत् ई कह्यो। मुख्यमंत्री कह्यो के राज्य सरकार किसानां ने पाणत सारु पी.

एम. कुसुम योजना रे मार्फत दिन मांय बिजली मुहैया करावण बाबत् अहलकारां ने मिशन मोड माथे काम करण सारु कह्यो।

00000

राज्यपाल कलराज मिश्र विश्वविद्यालयां ने खेती-बाड़ी अर किसानां री बरकत सारु कृषि प्रबंधन सागे विपणन, भंडारण अर खाद्य प्रसंस्करण सरीखा मुद्दा माथे शोध अर नवाचार करणा चाहिजे। वे आज स्वामी केशवानंद राजस्थान कृषि विश्वविद्यालय रा बीसवां दीक्षांत समारोह मांय बोल रह्या हा। राज्यपाल विश्वविद्यालयां ने खेती-बाड़ी ऊं जुड़ी भणार्ई-लिखाई, शोध अर प्रसार मांय आर्टिफिशियल इंटेलिजेंस काम ले र किसानां ने खेती-बाड़ी ऊं जुड़ी तकनीकां री जाणकारी देवण सारु ई कह्यो। राज्यपाल नौजवानां ऊं विकसित भारत रो सपनो सांचो करण सारु काम करण बाबत् कह्यो। राज्यपाल 19 विद्यार्थियां ने सोना रा तमगा अर तीन विद्यार्थियां ने कुलाधिपति स्वर्ण पदक दे र नवाजा। राज्यपाल कृषि विश्वविद्यालय परिसर मांय संविधान पार्क, कृषि महाविद्यालय मांय डॉ. एम.एस.स्वामीनाथन छात्रावास जनता ने सूप्या अर कृषि ज्ञान रथ ने हरी झंडी बता र रवाना कीनो।

00000

जम्मू-कश्मीर मांय व्ही आतंकी वारदात मांय मरण वाळा 4 जणां रा शव जयपुर लायां पाछे आज जयपुर रा मुरलीपुरा अर चौमूं पुलिस थाना सामी जनता प्रदर्शन कीना। चौमूं मांय संवारे साढे दस बज्यां सरु करी ज्यो धरनो मरण वाळां रा पिरवार वाळां ने 50 लाख रुप्या रो मुआवजो देवण, पिरवारा रा दो सदस्यां ने संविदा रा आधार ऊं नौकरी देवण अर एक डेयरी बूथ देवण परां प्रशासन सागे राजीनामा पाछे सिंज्यां साढे 4 बज्यां खत्म कर दियो ज्यो। चौमूं री विधायक शिखा मील बराला खबरनवीसां ने बतायो के आतंकी वारदात रे खिलाफ रीस्योडा लोग धरनो दीनो। हालांकि जयपुर रा मुरलीपुरा मांय हाल ई प्रशासन सागे एक राय नी बणी है। इण ऊं पैली प्रदर्शन करण वाळा बाजार बंद कराया, गैला जाम कीना अर बस मांय तोड़फोड़ कीनी। पुलिस जाम खुलवावण सारु हल्की जोर आजमाइश कीनी।

00000

नुवा बणायी ज्या तीन आपराधिक कानून एक जुलाई 2024 ऊं लागू व्हे जावेला। आं कानूनां रा बारा मांय जाणकारी देवण सारु आकाशवाणी समाचार जयपुर री ओर ऊं प्रादेशिक समाचार बुलेटिन मांय नुवी श्रृंखला चलायी जा रही है। आज पेश है बच्चां अर किशोर उम्र वाळा कानी ऊं अपराध करण रा बारा मांय बणायी ज्या नुवा प्रावधानां री जाणकारी-

भारतीय न्याय संहिता-बीएनएस री धारा 20 रे मुजब सात साल ऊं कम उम्र रा बच्चां कानी ऊं करी ज्यो कोई ई काम अपराध नी मान्यो जावे है। इण री धारा 21 रे मुजब सात ऊं 12 साल ताई उम्र रा बच्चां कानी ऊं करी ज्या काम ई अपराध री श्रेणी मांय नी मान्या जावे है। बीएनएस री धारा 401 रे मुजब चोखा चाल चलन या चेतावनी पाछे, निगराणी रा तैत रिहा करण रा हुकम दिया जा सके है। किशोर न्याय कानून रे मुजब कानून रो उल्लघन करण वाळा बच्चां ने पुलिस कानी ऊं पकड़्या जावण परां विशेष किशोर पुलिस इकाई या नामित बाल कल्याण पुलिस अधिकारी री निगराणी मांय राख्या जावणा चाहिजे अर वां ने पकड़बा रा 24 घंटा मांय किशोर न्याय बोर्ड सामी पेश करणो व्हेला। बच्चां ने पुलिस लॉकअप मांय या जेल मांय बंद नी कर्या जा सके है। ऐडा बच्चां ने जमानती या गैर-जमानती अपराध री सूरत मांय जमानत सागे या बिना श्योरिटी रिहा कर्या जावणा चाहिजे। केवल कुछ खास हालात मांय वां ने जमानत माथे रिहा नी कर्या जा सके है, पण वां स्थिति मांय बच्चां ने किशोर न्याय बोर्ड सामी पेश कर्या जावण ताई तय तरीका ऊं अवलोकन घर मांय राख्या जावणा चाहिजे।

0000

राज्य मांय आज ई केई ठोड़ां बिरखा व्ही। केकड़ी जिला मांय व्ही रिमझिम बिरखा ऊं गर्मी ऊं साता मिली। जोधपुर ग्रामीण जिला मांय ई आंधी चाली अर कटे-कटे छांटो छिड़को व्हयो। नागौर मांय दोपेरां पाछे करीब एक घंटा ताई रुक-रुक र व्ही बिरखा ऊं गर्मी ऊं साता मिली। श्रीगंगानगर मांय सिंज्या तेज बिरखा व्ही। भीलवाड़ा मांय करीब आधा घंटा ताई व्ही बिरखा ऊं पारो थोड़ो उतरयो। उदयपुर मांय दोपहरां री बगत व्ही तेज बिरखा ऊं सड़कां माथे पाणी भर ग्यो अर केई रूखड़ा उखड़ ग्या।

000000

अलवर जिला रा सरिस्का बाघ अभ्यारण्य री अकबरपुर रेंज मांय बाघिन एसटी-17, तीन बच्चां सागे निजर आयी है। ई पाछे अभ्यारण्य मांय बाघां री तादाद 43 व्हे ग्यी है। सरिस्का मांय अब 11 नर, 14 मादा अर 18 बाघ व्हे ग्या है। वन मंत्री संजय शर्मा ई माथे खुशी जताई है। प्रशासन री ओर ऊं बाघिन अर वां रा बच्चां माथे लगातार निजर राख्यी जा रही है।

000000

बाड़मेर जिला मांय तेल री खोज करण वाळी कंपनी केयर्न इंडिया देश री सब ऊं मोटी क्षारीय पॉलीमर इंजेक्शन परियोजना सरू कीनी है। ई नुवी तकनीक रा इस्तेमाल ऊं बाड़मेर जिला रा मंगला तेल हलका मांय तेल रा उत्पादन मांय बधोतरी व्हेला। और ब्यौरो म्हाणा खबरनवीस ऊं -

.....

000000

राजस्थान पुलिस दिवस रा सिलसिला मांय आज ई केई ठोड़ां कार्यक्रम राख्यी ज्या। श्रीगंगानगर मांय एस.पी. गौरव यादव री अगुवाई मांय सुखाडिया सर्किल ऊं सदर थाणा ताई 'पुलिस भरोसा' दौड़ राख्यी ज्यी अर पुलिस लाइन मांय खूनदान शिविर लगायी ज्यो। हनुमानगढ़ जिला रा सतीपुरा मांय गांव वाळा श्मशान मांय 50 पौधा रोप्या। भरतपुर रा पुलिस परेड ग्राउण्ड मांय परेड राख्यी ज्यी।

ई मौके पुलिस वाळा एस.पी. रा दफ्तर समेत सगळा पुलिस थाणा अर पुलिस परेड ग्राउंड मांय साफ सफाई कीनी अर पौधा रोप्या। बूंदी री पुलिस लाइन डिस्पेंसरी मांय खूनदान शिविर लगायी ज्यो जिण मांय एस.पी. समेत मोटी तादाद मांय पुलिस वाळा खून दान कीनो। झालावाड़ मांय पुलिस लाइन ऊं मंगलपुर मूर्ति चौराहा ताई वाहन रैली निकाळी ज्यी। ई मौके एस.पी. ऋचा तोमर सगळा थानेदारां ने नुवा कानूनां रा बारा मांय जाणकारी दीनी। अजमेर मांय लगायी ज्या खूनदान शिविर मांय मोटी तादाद मांय पुलिस वाळा खून दान कीनो। वठे संवारे पुलिस लाइन ऊं वैशाली नगर रीजनल कॉलेज ताई साइकिल रैली निकाळ र पर्यावरण री हिफाजत रो संदेश दियो ज्यो। केकड़ी मांय लगायी ज्या खूनदान शिविर मांय 52 यूनिट खून भेळो करी ज्यो। ई मौके एस.पी. विनीत कुमार बंसल पुलिसवाळा री मीटिंग ले र वां री समस्यावां री जाणकारी लीनी।

बांसवाड़ा मांय रेंज आई. जी. अर एस.पी. री मौजूदगी मांय पुलिस लाइन परिसर मांय पौधा रोपी ज्या।

000000

पैली वाळा केंद्रीय मंत्री राजेश पायलेट ने आज वां री बरसी रै मौके सिरधा भाव सागे याद करी ज्या। ई मौके दौसा जिला रा जीरोता मांय सर्व धर्म प्रार्थना सभा राख्यी ज्यी। कार्यक्रम मांय राज्य रा पैली वाळा उप मुख्यमंत्री अर राजेश पायलेट रा बेटा सचिन पायलट, हाल ही मांय सांसद बण्या उम्मेदाराम बेनीवाल, राहुल कस्वाँ, बृजेंद्र ओला, मुरारी मीणा, हरीश मीणा, संजना जाटव, कुलदीप इंदौरा अर पैली वाळा मंत्री ममता भूपेश, प्रताप सिंह खाचरियावास, हेमाराम चौधरी अर हरीश चौधरी समेत मोटी तादाद मांय जनता मौजूद रही। भरतपुर मांय ई राजेश पायलट पार्क अर पायलट

छत्रावास मांय वां री मूरत माथे सिरधा रा फूल चढा र पायलेट ने याद करी ज्या। अजमेर मांय ई खास कार्यक्रम राख र राजेश पायलट ने याद करी ज्या।

00000